

Morning Dogri (NSD) National News Bulletin 04-11-2024

आकाशवाणी

- प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज झारखंड च दऊं चुनां रैलिएं गी संबोधत करगंन।
- महाराष्ट्र विधानसभा चुनां लेई नामांकन परताने दा अज्ज खीरी ध्याड़ा ऐ। 30 अक्तूबर गी पर्चे दी जांच मगरा 7 ज्हार 73 मेदवारें दे पर्चे वैद्य पाए गे।
- जम्मू कश्मीर विधानसभा अज्ज नमें स्पीकर दा चुनां करोग।
- मध्यप्रदेश सरकार नै जंगली जानवरें दे हमले च मरने आले दे परोआरें गी दित्ते जाने आली मुआवजे गी 8 लक्ख शा बधाइयै 25 लक्ख करी दित्ता ऐ।
- अज्ज नमीं दिल्ली दे भारत मंडपम च अंतर्राष्ट्रीय सौर गठबंधन दे 7में सत्र दा उद्घाटन कीता जाग।
- भारत नै कोलोराडो च अंडर-19 विश्व मुक्केबाजी प्रतियोगिता च शानदार प्रदर्शन करदे होई 4 सुन्ने दे तगमे सनें कुल 17 तगमे हासल कीते न।

<><><><><><>

PM Rally

प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज झारखंड च 2 चुनावी रैलिएं गी संबोधत करगंन। ओह राज्य च विधानसभा चुनां दे सिलसिले च बीजेपी दे नेतृत्व आले राष्ट्रीय जनतांत्रिक गठबंधन दे मेदवारें आस्तै समर्थन मंगगन। झारखंड दे प्रदेश बीजेपी अध्यक्ष ते साबका मुख्यमंत्री बाबू लाल मराडी होरें आखेआ जे प्रधानमंत्री होर बडलै 11 बज्जियै 30 मिंटे दे कोलकाल गठवा च पैहली जनसभा गी संबोधत करगंन ते 3 बजे दिने च चाईबासा च उंदी दूई जनसभा होग। झारखंड च चुनां कार्यक्रम दी घोषणा मगीर प्रधानमंत्री हुंदी एह पैहली चुनावी रैली होग। राज्य च 13 ते 20 नवम्बर गी 2 गोड़ें च चुनां होने न।

<><><><><><>

Maharashtra

महाराष्ट्र विधानसभा चुनां लेई भरी गेदी मेदवारी गी परताने च अज्ज खीरी तरीक ऐ। राज्य च 2 सौ 88 विधानसभा क्षेत्रें च चुनां आस्तै 29 अक्तूबर तगर 7 ज्हार 994 मेदवारें नामांकन दाखल कीता। 30 अक्तूबर गी होई दी जांच मगरा 7 ज्हार 73 मेदवारें दे कागज पत्र वैद्य पाए गे। महाराष्ट्र दे मुख चुनां अधिकारी होरें दस्सेआ जे 821 मेदवारें दे आवेदन गी रद्द करी दित्ता गेआ ऐ। महाराष्ट्र च 20 नवम्बर गी इक गै गेड़ च मतदान करोआया जाग। राज्य च मकाबला सत्ताधारी—महायुती ते विपक्षी महाविकास अघाड़ी गठबंधन बश्कार ऐ। सत्तसधरी महायुती गठबंधन च भारतीय जनता पार्टी, शिवसेना ते एनसीपी शामिल ऐ। जिसलै के महाविकास अघाड़ी च कांग्रेस, शिवसेना, यूबीटी ते एनसीपी शरद—चन्द्र पवार मुख पार्टियां शामिल न।

<><><><><><>

JK Assembly

जम्मू कश्मीर विधानसभा दा सत्र अज्जै थमां शुरू होआ'रदा ऐ। अज्ज स्पीकर दा चुनां होग। ओह्दे लेई एनसी नेता ते साबका मंत्री अब्दुल रहीम राथर हुंदे नां दा प्रस्ताह् उे। जारी कैलेंडर मूजब विधानसभा सत्र बडलै साढ़े 10 बजे शुरू होग ते पैहले स्पीकर दा चुनां होग।

<><><><><><>

PM-TB

प्रधानमंत्री नरेंद्र मोदी होरें आखेआ ऐ जे टी.बी दे मामले च कमी भारत दे समर्पित, अनथक ते अभिनव जत्नें दा गै नतीजा ऐ। मुख दी प्रगति दी सराहना करदे होई मोदी होरें सोशल मीडिया पोस्ट च उनें आखेआ जे सामूहिक भावना राएं सरकार टी. बी मुक्त भारत दी दिषा च कम्म करदी रौहग। विश्व सेहत संगठन मूजब भारत च 2015 थमां 2023 तगर टी.बी दे मामले च 17 अशारिया 7 फीसद दी कमी दर्ज कीती गई ऐ। एह् दर वैश्विक गिरावट 8 अशारिया 3 फीसद थमां दूनी बी मती ऐ। सोशल मीडिया दी इक पोस्ट च जानकारी सांझा करदे होई सेहत मंत्री जे.पी नड्डा होरें इस गल्ला पर जोर पाया जे टी.बी दी रोकथाम भारत दे तब्दीलिएं आले नजरिए गी दर्शादी ऐ।

<><><><><><>

Delhi

दिल्ली एनसीआर च ब्हाऊ दी गुणवत्ता लगातार खराब होंदी जा'रदी ऐ ते कल संजा 7 बजे ब्हाऊ दी गुणवत्ता सरबंधी सूचकांक 381 तगर पुज्जी गेआ। इस क्षेत्र च ब्हाऊ दी गुणवत्ता बड़ी गै खराब श्रेणी च बनी गेदा ऐ। केन्द्रीय प्रदूषण नियंत्रण बोर्ड दे आंकड़े मूजब शैहर दे किश हिस्से च ब्हाऊ दी गुणवत्ता सूचकांक 400 दे आंकड़े गी पार करियै बड़े मते गंभीर स्तर तगर पुज्जी गेआ ऐ।

<><><><><><>

MP

मध्यप्रदेश सरकार नै जंगली जानवरें दे हमले च जाने मोआने आले दे परोआर आलें गी दित्ते जाने आले मुआवजे गी बधाइयै 8 लक्ख शा 25 लक्ख रुपे करी दित्ता ऐ। एह ऐलान हाल च गै उमराय जिले च बन्दवगढ़ टाईगर रिसर्व हाथी दे हमले च दऊं लोकें दी जान चली जाने दी पछोकड़ै च लैता गेआ ऐ।

<><><><><><>

ISA

अज्ज नमीं दिल्ली च अंतर्राष्ट्रीय सौर गठबंधन आईएसए दे 7में सत्र दा उद्घाटन भारत मंडपम च कीता जाग। आईएसए असैंबली अंतर्राष्ट्रीय सौर गठबंधन दी पैहल उप्पर बचार करोग, जेहड़ी ऊर्जा दी उपलब्धता सुरक्षा ते परम्पराएं गी प्रभावत करदी ऐ, जिस च सदस्य मुखें गी सौर ऊर्जा गी अपनाने ते सौर तैनाती च तेजी आन्नने लेई माली मदाद किट्ठी करने पर ध्यान केन्द्रित कीता जंदा ऐ।

<><><><><><>

Dr. Jaishankar

विदेश मंत्री डॉ. एस.जयशंकर होरें गलाया ऐ जे भारत नै इक ऐसी रूपरेखा तैआर कीती ऐ जेहदे कन्नै ओने आले समें च आस्ट्रेलिया कन्नै सरबंध होर मजबूत होंगन। उनें गलाया जे दवै मुखें बश्कार बदलाव अपने आप नेई सगुआं दवै पक्खें दे जतनें, नेतृत्व ते महत्वकांक्षी कन्नै होआ ऐ।

डॉ. जयशंकर होरें दवै मुल्खें दी यात्रा दे पैहले गेड़ च आस्ट्रेलिया च बरीसबेन दे क्वीसलैंड विश्वविद्यालय च भारतीय प्रवासिएं गी संबोधत कीता। उनें गलाया जे भारत उच्च विकास आली बक्खी बधा'रदा ऐ ते दुनिया कन्नै ओह् अगो बधना चाहदा ऐ। डॉ. जयशंकर होरें गलाया जे भारत दी दुनिया दे चुनिंदा मुल्खें कन्नै व्यापक रणनीतिक सांझेदारी ऐ ते आस्ट्रेलिया उंदे शा इक ऐ। भारत आस्ट्रेलिया सरबंधें दी प्रगति च प्रधानमंत्री नरेन्द्र मोदी आस्ट्रेलिया दी सरकार वैश्विक गतिशीलता ते भारतीय प्रवासिएं दे जतन महत्वपूर्ण न। डॉ. जयशंकर होर अपनी यात्रा दे दुए गेड़ च 8 नवम्बर गी सिंगापुर जांगन।

<><><><><><>

Ashwani Vaishnav

रेल मंत्री अश्विनी वैष्णव होरें आखेआ ऐ जे नमीं तकनालोजी दे इस्तेमाल, नमीं आधुनिक रेल दी शुरूआत ते अगले ब'रे विद्युतिकरण पूरा होने दे कन्नै गै मुल्ख भरै च अगले 5 थमां 7 ब'रे दे अंदर अंदर रेल यात्रा दे अनुभव च टकोहदा ते व्यापक बदलाव होने आला ऐ। वैष्णव होरें एह् गल्ल कल संजा कोझिकोड च इक मीडिया कार्यक्रम दा उद्घाटन करने मगरा आक्खी। उनें आखेआ जे अमृत भारत स्टेशन, पुर्नविकास योजना तैहत् इक लक्ख करोड़ रपे दी लागत कन्नै 1334 स्टेशनें दा पुर्नविकास कीता जा'रदा ऐ जेह्दे कन्नै 11 सौ स्टेशनें पर निर्माण कम्म प्रगति पर ऐ। उनें आखेआ जे भारत दी विशाल रचनात्मक क्षमता दा इस्तेमाल करने आस्तै सरकार मुल्खें दे बक्ख-बक्ख हिस्सें च नेह् संसीने दी श्रृंखला कायम करने दी योजना बना'रदी ऐ।

<><><><><><>

Special Trains

ध्यारें दौरान यात्रिएं दी सहूलत आस्तै रेलवे दिल्ली-एन.सी.आर थ्वां मुल्ख दे बक्ख-बक्ख हिस्सें आस्तै 20 रेल गड्डियां चला रदा ऐ। इंदे च दरभंगा, बरौनी, पटना, कटड़ा, मुज्जफरपुर, बलिया, कामाख्या ते आजमगढ़ लेई रेल गड्डियां शामिल न। छठ पूजा लेई 145 बाढ़ू रेल गड्डियां 2 थ्वां 8 तरीक बश्कार चलाइयां जा'रदियां न। रेलवे आस्सेआ चलाई जा'रदी इनें रेल गड्डियें कन्नै 2 लक्ख यात्रुएं गी हर रोज यात्रा दौरान सहूलत होग। भारतीय रेलवे पैहली अक्तूबर थ्वां 30 नवंबर बश्कार तकरीबन 7 जहार खास रेल गड्डियां चला'रदा ऐ। इस दौरान तकरीबन 1 करोड़ यात्रुएं गी सहूलत होग।

हर बरे रेलवे ध्यारें आहली रूतै दौरान खास रेल गड्डियां चलांदी ऐ। पिच्छले बरे दे मुकाबले इस बरे 2 जहार 800 मती रेल गड्डियां चलाइयां जा'रदियां न।

<><><><><><>

Boxing

भारत नै अमरीका दे कोलरेडो च अंडर-19 विश्व मुक्केबाजी प्रतियोगिता च शानदार प्रदर्शन कीता ऐं इस प्रतियोगिता च शानदार मर्द ते महिला वर्ग च भारतीय दल नै 4 सुन्ने दे तगमे सने 17 तगमे जित्ते। भारतीय दल च 9 मर्दे ते 10 महिलाएं सने 19 मुक्केबाज शामिल न जिंदे च 12 फाइनल तगर पुज्जी चुके दे न ते हर महिला मुक्केबाज इक तगमा जित्तने च सफल रेई ऐं भारत लेई सुन्ने दा तगमा जित्तने आले च हेमंत सागवान इक्कले मर्द मुक्केबाज न, जदके महिलाएं च कृषा वर्मा, पार्थवी ग्रेवाल ते वंशिका गोस्वामी नै सुन्ने दा तगमा हासल कीता। भारत हुन मुक्केबाजी च अपनी चेची थाहर बनाने दी कोशिश करा'रदा ऐ। 2028 दे लॉस एंजलस ओलंपिक च इस खेड्ड गी शामिल कीते जाने दी मेद ऐ।

<><><><><><>